



Willemstad: 19 di Ougùstùs 2019

Komunikado di: The Suit LLDS (Longitude & Latitude Divers & Swimmers)

Pa publikashon immediato

## **The Suit lo tira lus riba ref di koral di Kòrsou di un forma spesial**

WILLEMSTAD - Curaçao Underwater Kunuku. Bo ke sa mas di nos kunuku bou di superfisie di laman? E ora ei for di 30 di Ougùstùs bo mester sigui *'The Suit'* ku lo baha na laman na e parti mas ost di nos isla i djei ta snòrkel bin direkshon west di nos isla. *'The Suit LLDS'* (Longitude & Latitude Divers & Swimmers), ku ta e nòmber ofisial di un grupo grandi di boluntario i instansia ku stima nos isla, den un forma konkreto ke kontribuí na promové e bunita refnan di koral di Kòrsou. *'The Suit'* lo snòrkel aproksimadamente 100 kilometer i durante di trayekto aki lo filma e 'kunuku' bou di laman na kosta sur di nos isla. E meta? Produí un dokumental spesial di e mundu bou di laman ku enfoke riba e echo ku no ta solamente buseadónan por eksperensia e bunitesa bou di laman di nos isla, pero ku landando serka di kosta sur ku un dùikbrel i snòrkel tambe por disfrutá di esaki. Di e grabashonnan realisá lo traha un dokumental spesial.

Organisashonnan manera CTB i CHATA lo por hasi uso di e dokumental aki pa merkadeá nos isla durante di presentashonnan i eksposishonnan di turismo entre otro na e konferensha di buseo DEMA ku lo tuma lugá na final di e aña aki. Esaki lo ta un regalo di *'The Suit'* pa Kòrsou.

E ekspedishon di snòrkel aki ta inisiá djabièrnè 30 di Ougùstùs na Ostpùnt kaminda *'The Suit'* lo bula na laman for di PELICAN EXPRESS. *'The Suit'* lo landa un trayekto di 10 kilometer direkshon west. E promé stòp lo ta na Fuik. Djasabra dia 31 lo evaluá e promé parti di e trayekto i lo hasi ahuste na e siguiente trayektonan si ta nesesario. E dia ei *'The Suit'* lo no landa. Djadumingu dia 1 di Sèptèmber lo kontinuá e ruta di Fuik pa Marichi. Djaluna *'The Suit'* lo landa di Marichi pa Carmabi. Lo landa drenta Bahia di Santa Ana. Pa por hasi esaki Curaçao Ports Authority lo duna

su kontribushon pa wanta e tráfiko marítimo den i pafó di bahia un ratu pa garantisá seguridat di *'The Suit'*. Lo kontinuá e trayekto for di Carmabi te Vaarsenbaai (Kokomo). Djarason 4 di Sèptèmber ta dia di sosiegu. Djaweps 5 di Sèptèmber *'The Suit'* ta baha na awa atrobe na Kokomo i i lo snòrkel bai direkshon di Karakter, na Rif St Marie. E dia siguiente ta kontinuá e trep direkshon Sta. Martha. Di Sta. Martha lo kontinuá rumbo pa bahia di Lagun. E último parti di e trayekto lo ta di Lagun pa Westpunt. Djadumingu 8 di Sèptèmber lo mester yega e punta mas wèst i mas alabes e punta mas nort di Kòrsou.

Riba e ruta di Ost bai Wèst aki *'The Suit'* lo risibí kompania spesial na sierto partinan di e ruta. Por hasi menshon ku *'Bob the flamingo'* lo kompañá *'The Suit'* na sierto partii di e trayekto huntu ku veterinario Odette Doest.

Durante di e ekspedishon di snòrkel aki *'The Suit'* lo subi na kantu na algun parti di Kòrsou kaminda lo tene un aktividat ku tin un link ku Kòrsou en general i nos 'kunuku' bou di laman en partikular. Lo ekipá *'The Suit'* ku un sistema di 'tracking' di forma ku por sigui e tim di landadó durante hinter e trayekto. *'The Suit'* lo tin alabes un body-cam i un camara di man ku lo mester perkurá pa bista espektakular di nos 'kunuku' bou di laman. Un ekipo di kamarógrafo lo landa huntu pa perkurá pa imágenan horizontal pa e dokumental na e sitio di 'drop off' òf rant blou i pone *'The Suit'* den pantaya.

Den e proyekto, na kua a dediká vários luna di preparashon, tin diferente instansia ku ta brinda kolaborashon. Den esakinan por hasi menshon di e.o.: Coral Restoration Foundation, Sea Turtle Conservation, Carmabi, Bob de Flamingo, Kids for Coral, Uniek Curaçao, Bedrijven Platform Milieu, Coral Reef Game & Sinuhe Oomen, pa asina trese e kunukunan di bou di awa i riba awa huntu i stimulá unidat.

Banda di e meta pa produsí un bunita dokumental di Curaçao Underwater Kunuku, di kua organisashonnan manera CTB i CHATA por hasi uso, lo pone partinan di e material grabá na disposishon di CARMABI pa investigashon sientífiko i tambe metanan edukativo.

Banda di komunikadonan na prensa ku e tim di komunikashon di *'The Suit'* lo perkurá p'e. Frits Terborg lo ta e bosero di proyekto i lo proveë informashon via di entrevistanan. E kompania LOYALS a tuma enkargo di merkadeo i komunikashon a diario via di e páginanan di Facebook i Instagram di *'The Suit'*.

###

---

Informashon pa prensa:

E-mail di bosero lo ta: [fritsterborg@gmail.com](mailto:fritsterborg@gmail.com)